

LIGJ
Nr.7605, datë 15.9.1992

PËR NËNDARJET NË BASHKI E KOMUNA DHE ORGANIZIMIN E FUNKSIONIMIN E
BASHKISË SË TIRANËS

Në zbatim të neneve 5 e 6 të ligjit nr.7570, datë 3.6.1992 "Për disa shtesa në ligjin nr.7491, datë 29.4.1991 "Për dispozitat kryesore kushtetuese", me propozimin e Këshillit të Ministrave,

KUVENDI POPULLOR
I REPUBLIKËS SË SHQIPËRISË

V E N D O S I :

I. PËR NËNDARJET NË BASHKI

Neni 1

Në bashkitë e qyteteve me popullsi mbi 40 mijë banorë krijohen lagje administrative. Lagjja, si rregull, duhet të ketë jo më pak se 20 mijë banorë.

Numri i lagjeve caktohet nga Këshilli i Ministrave.

Kufijtë midis lagjeve vendosen nga këshilli i bashkisë.

Neni 2

Në lagje funksionon aparati administrativ. Struktura dhe numri i punonjësve të aparatit të lagjes caktohet nga këshilli i bashkisë, kurse emërimi, shkarkimet e pagat e personelit të tij vendosen nga kryetari i bashkisë.

Punonjësit e administratës së lagjes varen drejtëpërdrejt nga seksionet ose zyrat e aparatit të bashkisë dhe përgjigjen para tyre për plotësimin e detyrave të ngarkuara.

Neni 3

Për drejtimin e punës së aparatit të lagjes, kryetari i bashkisë emëron një administrator të lagjes.

Administratori i lagjes kryen detyrat që caktohen nga këshilli i bashkisë. Ai kryen këto detyra kryesore:

1. Organizon, drejton e kontrollon punën e personelit të lagjes në përputhje me detyrat e dhëna nga bashkia.

2. Merr masa për zbatimin e ligjeve dhe të akteve të organeve të bashkisë nga personat juridikë e fizikë, shtetërorë a privatë, si dhe nga shtetasit.

3. Ngre probleme e bën kërkesa në organet e bashkisë dhe në aparatin e saj për plotësimin e nevojave të banorëve të lagjes.

4. Përgjigjet para kryetarit të bashkisë dhe zëvendësave të tij për plotësimin e detyrave nga personeli i administratës së lagjes.

II. PËR NËNDARJET NË KOMUNA

Neni 4

Në komuna krijohen nëndarje administrativo-tokësore mbi bazë fshati.

Neni 5

Krijimi i fshatrave të reja ose bashkimi i tyre bëhet nga këshilli i rrethit, duke organizuar paraprakisht referendum.

Neni 6

Fshati drejtohet nga kryeplaku (kryetari) që caktohet nga pleqësia (përfaqësia) e fshatit, që është organ këshillimor i tij.

Anëtarët e pleqësisë (përfaqësisë) caktohen nga secila lagje ose fshati në mbledhje të hapët, ku marrin pjesë jo më pak se gjysma e atyre që kanë të drejtë vote.

Kryeplaku (kryetari) e pleqësia (përfaqësia) caktohen për një periudhë 2 vjeçare.

Numri i anëtarëve të pleqësisë (përfaqësisë) caktohen nga këshilli i komunës mbi bazën e numrit të lagjeve dhe të banorëve të fshatit.

Vendimet e organeve të komunës janë të detyrueshme për kryeplakun (kryetarin).

Caktimi dhe veprimtaria e kryeplakut (kryetarit) dhe i pleqësisë (përfaqësisë) mbikqyret nga organet e pushtetit të komunës.

Neni 7

Kryeplaku (kryetari) i fshatit nuk është funksionar.

Kriteret për shpërblimin e tij për punën që kryen caktohen nga Këshilli i Ministrave.

Neni 8

Kryeplaku (kryetari) i fshatit kryen detyra që përcaktohen në rregulloren e këshillit të komunës në përputhje me kushtet specifike të vetë komunës e të fshatit përkatës.

Ai merr pjesë në mbledhjen e këshillit të komunës pa të drejtë vote.

Në mënyrë të veçantë kryen këto detyra:

1. Kujdeset për ruajtjen e rendit publik në fshat në bashkëpunim me policinë.
2. Merr masa për plotësimin e nevojave me karakter social e komunal të fshatit, siç janë ato të shërbimit të varrezave, të mirëmbajtjes së mjediseve kulturore e sportive, rrugëve, të ujësjellësve, të linjave telefonike, elektrike etj., në përputhje me fondet e akorduara në buxhet, nga investitorë të ndryshëm ose edhe me kontributin e vetë banorëve.
3. Cakton mënyrën e shfrytëzimit të burimeve me ujë të pijshëm, mënyrën dhe radhën e përdorimit të ujërave për ujitje, si dhe dhe rregullat për shfrytëzimin e kullotave e të pyjeve që janë prona fshati ose në përdorim të tij.
4. Shqyrton kërkesat e ankesat e banorëve të fshatit dhe bën përpjekje për zgjidhjen e mosmarrëveshjeve ndërmjet tyre.
5. Merr masa për përmirësimin dhe mbrojtjen e mjedisit në fshat.
6. Kontrollon zbatimin e disiplinës nga punonjësit e komunës që punojnë në fshat dhe informon për punën e tyre kryetarin e komunës.
7. Parashtron në organet e pushtetit të komunës ose në organet më të larta probleme me interes për banorët e fshatit dhe u jep përgjigje këtyre të fundit për zgjidhjet e tyre.
8. U lëshon vërtetime banorëve të fshatit për fakte e të dhëna të njohura mirë nga vetë ai.

III. PËR ORGANIZIMIN E FUNKSIONIMIN E BASHKISË SË TIRANËS.

Neni 9

Organet e pushtetit në Bashkinë e Tiranës janë: këshilli i bashkisë dhe kryetari i bashkisë. Ato veprojnë të pavarura dhe drejtojnë punët publike në qytetin e Tiranës.

Neni 10

Për Bashkinë e Tiranës janë të vlefshme dispozitat e ligjit nr.7572, datë 10.6.1992 "Për

organizimin dhe funksionimin e organeve të pushtetit lokal", që lidhen me përbërjen, krijimin dhe funksionimin e organeve të bashkisë.

Këshilli i bashkisë zbaton kompetencat e caktuara në nenin 14, kurse kryetari i bashkisë ato të nenit 34 të ligjit të lartëpërmendur.

Këshilli i bashkisë ushtron dhe kompetencat e këshillit të rrethit, zbatimi i të cilave lidhet me qytetin, si dhe çdo kompetencë tjetër të njohur me ligj.

Neni 11

Ky ligj hyn në fuqi menjëherë.

Shpallur me dekretin nr.305. datë 21.9.1992 të Presidentit të Republikës së Shqipërisë, Sali Berisha.